

Forfatter: Blicher, Steen Steensen

Titel: Udrag fra E Bindstouw (DK) (paralleltekst med Rigsmålgengivelse)

Citation: Blicher, Steen Steensen: "Noveller", i Blicher, Steen Steensen: *Noveller*, udg. af Esther Kielberg ; Henrik Ljungberg , Det Danske Sprog- og Litteraturselskab, Borgen, 1991, s. 268. Onlineudgave fra Arkiv for Dansk Litteratur: <https://tekster.kb.dk/catalog/adl-texts-blic03val-shoot-idm140515387141088/facsimile.pdf> (tilgået 17. maj 2021)

Anvendt udgave: Noveller

Vi had jen Sæng aa legg wos i, ek heje ku vi soww,  
Fa di had loc wos sammen i wor ejen Byssiloww.  
Te Skwol aa fræ Skwol gik vi knøwt, aa haalt hweranres Hinner;  
Aa hwær en Puhs A boer hin øwr, faa de te hun wa minnet.

Saa fultes vi, mens vi wa smo; aa sihn da vi bløw støhr,  
Vi gik jit Vinter begi Tow te Præjsten i Faahøer.  
Aa saa bløw hun mi Gajlam, aa A hin Nøjorsgaw da,  
Degaang te di djeit Kjerster ued i Kaal- aa Pigi-law da.

Men sihn da A wust bæjer te, aa bløw di jit aa tyww:  
Saa maat A te Sessioen, aa spring Sældaet, aa læ mæ sikryww.  
A fek mi Pas, aa Sessel græed aa saah: »Faawal no, Pier!  
A tinke ves, Do go di Vej, A sie Dæ aalle mier.»

Hun græed -- A græed -- de war en Ænk aa vi græed begi Tow.  
Men da vi skeltes lowed hun, te hun sku blyw mæ trow.  
Saa maat A da massier astej aa ind te Reggemintet.  
A soe hin et i ølle Oer; de had A aalle vintet.

I tow Oer gik A Skuolen fram, aa sihn kam A i Krie.  
Die lid A Unt aa Hoerbied; de war en sølle Ti.  
Tesist kam A i Slaw, aa fek mi høwer Arm spolieret.  
Di skoer en aa ve Aawselen; aa saæn bløw A korieret.

Di kunn ett brugh mæ længer dier, aa dæfor fek A Low.  
Saa gik A hjem den laange Vej tint uhd fræ Issehow.  
A tinnt saa zit aa manne Gaang: hudan mon Sessel haar et?  
Kahænsæ hun æ doe aa henn: saa æ hun wal faawaaret.

Aa som A kommer te wor Bøj, aa ste te Muotens Goer,  
Hwor A had lowd saa glæddele mi guede Ungdorns Oer,  
Da wa der Spel aa Løstehied, aa Huset fulh aaw Gjæjster,  
Aa Gillwown i den hiele Goer, aa Towten fulh aaw Hæjster.

Aa da A kam saa te den Daer, aa saah: Gusfrej herinn!  
Da wa dær ekke Jenh, saa' tak; ekk Jen dæ ku mæ kinn.